



大清文宗協天翊運執中垂謨懋德振武聖孝淵恭端仁寬敏
顯皇帝實錄卷之六十三

咸豐二年壬子六月庚辰朔以安徽清查藩庫出力予知府
傅繼勛等加銜升敘有差○辛巳

上詣綺春園問

皇貴太妃安○諭內閣吳文鎔奏動款分年修造軍械等項一
摺雲南省道光二十五六等年永昌案內並雲緬彌渡保山
等案內損失軍械用缺火藥鉛丸等項經該督查照各標營
報冊分別准駁籌款修造約需銀四萬三千餘兩著准其將
各營公費歲撥餘賸節省銀兩動用五年後照額補全另片

奏。此次應補軍械。統由該督在省委員監視修造。毋庸交各營領辦之處。均著照所請行。該督務當隨時查覈。毋任草率偷減。仍於每年工竣後。另行造冊奏銷。○以翰林院侍講學士訥爾濟。侍讀孫鼎臣。侍講廣鳳。編修晉康。詹事府少詹事王履謙。充日講起居注官。翰林院編修卓標。呂官孫。署日講起居注官。○緩雲南黑鹽井竈商。應解續捐銀。○壬午。以翰林院侍讀學士潘曾榮。為光祿寺卿。○以先聖周公後裔東野茂嵩。承襲五經博士。○癸未。上詣綺春園。問

皇貴太妃安。○諭內閣。陸建瀛等奏。遵籌漕運事宜一摺。據稱

現在東省水勢驟長。八插已無岸可循。重運恐難逆輓。請分別變價海運。並酌量起卸。辦賑截漕。抵給兵餉。及行月兵匠等米各款。著戶部速議具奏。其業經渡黃各幫船。仍著嚴催前進。毋任遲延。另片奏。銅鉛船隻。亦難上輓。須豫籌變通之計。請由臺莊陸運至濟甯。再行雇船載運北上等語。著戶部一併速議具奏。○諭軍機大臣等。季芝昌奏。浙江鄞縣奉化縣鄉民。因糧滋鬧。鄞邑首犯。已據鄉民縛送。奉化亦獲有從犯。應完糧賦。均照常輸納。惟東鄉拒捕梟徒。負嵎不服。經該督派委張從龍。前往曉諭。解散黨與。自無須重兵圍剿。該督已將前調官兵撤回歸伍。儻該梟徒等於曉諭後。仍不知感

悟必當加以兵力。現在椿壽署理巡撫。應如何調度之處。仍著李芝昌會同該署撫酌量情形。相機妥辦。能將首要各犯悉數擒獲。自可解散脅從。不致釀成大患。將此各諭令知之。

○福建陸路提督炳文奏。查閱所屬營伍情形。得旨。隨時加意操演。勿稍懈弛。閩省營伍陋習固深。然不可概以易興謗訕目之。作大員者。度量闊闊。方可汝之。此言是先存一弭謗見好之心矣。朕甚為汝憂。

○湖北巡撫龔裕等奏。洞庭湖寬闊數百里。水陸交通。此時賊在永州。自應豫為籌防。已撥調省兵丁二百名。赴蒲圻縣設防。博勒恭武現將提標兵五百名。帶赴荆江下游嘉魚等縣。察看水陸地勢。擇要防堵。仍俟

所調各兵陸續到省。妥為布置。報聞。

○以江西南昌城守協副將張廣信為福建汀州鎮總兵官。

○以催趲江浙回空糧船。並督辦挑河出力。予江蘇知縣翟鏞觀等。加銜升敘。有差。

○展緩江蘇清河。宿遷。海。沐。陽。四州縣。被水地方。新舊額賦。

○貸江蘇蘇松等屬幫丁銀穀。

○甲申。

上詣綺春園。問

皇貴太妃安。

○諭內閣。杜受田。怡良。奏。遵查山東賑務。先籌辦理情形。並將劉源灝酌擬章程十條。開單呈覽。一摺。據稱上年豐北漫口。山東濱河州縣被淹成災。魚臺最重。濟甯次之。金鄉。嘉祥。滕。嶧。又次之。曾經分別重輕。三次放賑。現在擬俟

河運各幫。有輓入東境者。即令先行起卸。以資散放等語。著即責成該省藩司劉源灝於散賑時。妥為經理。惟伏秋大汛以後。水勢大小。及收成豐歉。勢難豫定。著杜受田。怡良。咨明山東巡撫。飭令該藩司於秋收後。確查被災輕重。分別奏明辦理。至截漕備賑各幫船。昨已降旨諭令陸建瀛等。將業經渡黃船隻。嚴催前進。惟旗丁人等。既知漕糧作為賑米。恐沿途攬水和土。藉滋弊端。著楊殿邦督飭該管糧道。認真盤查。如交米時有短少潮溼等弊。即將丁般人等嚴懲究辦。仍責令賠繳。以重賑務。另單奏酌定限期。豫籌剝運。及遴委大員監盤分運。並分剝賑米存卸災區。剝運腳價作正開銷。豫查

戶口。分設米廠各事宜。俱著照所議辦理。仍責成該藩司隨時體察情形。斟酌妥辦。○又諭龔裕泰請將越分言事之知縣。交部議處等語。湖北枝江縣知縣朱啟鴻。稟陳廣西軍務。實屬越分言事。著交部照例議處。惟念該員籍隸桂林。於本地情形或能諳悉。著即飭赴廣西軍營。交勞崇光差遣委用。並著察其才具。能否得力。如係空言無實。即行據實參奏。○諭軍機大臣等。程喬采奏。遵覆寄信諭旨一摺。並陳道州接仗布置情形等語。逆匪占踞道州。已逾卅月。計各路調集兵勇。亦不為少。加以本地團練。亟宜乘該匪營巢未定之時。設法合力攻圍。該州地勢既屬平坦。與粵西崎嶇情形不同。正

可扼其要隘。前後兜剿。該督節制諸軍。即飭帶兵各員。相機妥速剿辦。萬勿遷延。致令該匪等深溝固壘。布置從容。復蹈永安之轍。該城內外。為賊匪偏脅之眾。原其心跡。不過畏累苟安。豈肯甘心從逆。乘此大兵雲集之時。當先曉諭該居民。或偵探賊蹤。或作為內應。及早掃除羣醜。得以共安社席。是亦固結人心。解散賊黨之一道也。至圍困賊匪。總以嚴斷接濟為要。米鹽之外。尤應嚴防火藥。透漏私售。即兵勇中大半楚粵之民。亦難保無與會匪暗通消息。私為接濟。即如廣東之羅鏡。廣西之永安等賊。皆圍困累月。若鉛丸火藥真能斷絕。逆匪豈能於彈丸之地。憑恃兇燄。久抗我軍耶。此節最為

要著。務須認真查察。勿受欺蒙。勞崇光現在是否與姚瑩許祥光等。駐劄永州。籌辦軍務。永州乃邊賊要路。防堵不可稍疏。仍須防賊回竄粵境。該督與勞崇光統籌全局。隨時知照。賽尚阿聲勢聯絡。使賊匪無可乘之隙。庶可一鼓殲滅。長沙省垣大吏。均非本任。一切鎮撫接應事宜。該督須時時兼顧。仍密飭地方官嚴查奸細。綏撫居民。是為至要。將此由六百里諭令知之。○舉行本年軍政。侍衛處鑿儀衛。滿洲蒙古漢軍各旗營。卓異官一百三十九員。才力不及官八員。年老官二十九員。有疾官二十六員。分別議敘處分如例。○以拏獲湖南衡陽等縣匪徒出力。予知府陶恩培等。升敘有差。○貸

湖南鳳凰。乾州。永綏。古丈。坪。保靖。五廳縣。屯丁穀石。○乙酉。上幸靜明園。○諭內閣。嗣後遇朕臨幸清漪園。靜明園。各衙門著照常帶領引見。○陝西陝安鎮總兵官福誠。奏報到任日期。得旨。認真整頓。不可甘蹈委靡之習。○丙戌。

上幸同樂園。賜王公大臣蒙古王貝勒等食。○諭內閣。賽尚阿奏。馳赴湖南永州督辦軍務一摺。現在粵匪竄踞道州。湖南軍務最關緊要。著賽尚阿即帶欵差大臣關防。扼要駐劄。會同程喬采。籌辦防剿事宜。相機調度。現在勞崇光已回廣西。徐廣縉亦經馳抵梧州。所有廣西軍務。即著徐廣縉會同勞崇光接辦。以專委任。○諭軍機大臣等。據賽尚阿馳奏逆匪

現踞道州。我軍圍剿情形。並通籌全局。現已馳赴永州督辦。各一摺。據稱嚴斷接濟一節。最關緊要。昨已諭令程喬采。認真查察。該大臣現已帶兵馳抵永州。著即將目前防剿事宜。會商妥辦。道州城外各險隘。現尚被賊占踞。務即嚴飭鎮將。先將各險隘攻破。撤其藩籬。使該逆株守孤城。庶可聚而殲。旃。另片奏。添調兵丁等語。四川前調之兵。業據徐澤醇奏稱。遴派啟程。自未便復令折回抽換。其松潘建昌二鎮續調官兵。並湖南湖北添調新兵。即著賽尚阿。程喬采。酌量情形。隨時飛調。或撥赴軍前。或酌留防守。一切機宜。朕亦不為遙制。至廣西各勇。既稱在途滋事。且多不願越境。此等無律之軍。

即勉強調派。何能得力。應如何酌留廣西。分撥防守。抑或應行遣散之處。均著該大臣等咨行徐廣縉。勞崇光。妥籌辦理。程喬采現在駐劄衡州。仍當兼顧湖北防堵事宜。隨時咨商台湧。龔裕。博勒恭武等。豫籌妥辦。不得顧此失彼。將此由六百里諭令知之。○又諭。據賽尚阿奏。勞崇光已由楚回粵。現擬統帶弁兵前赴湖南永州。並據徐廣縉奏。現抵肇慶。即日馳往梧州。各一摺。廣西大股逆匪。現雖竄越湖南。而本境零星土匪。尚未淨盡。波山艇匪。勢尤猖獗。徐廣縉現已馳抵粵西。所有該省堵剿各事宜。即責成該督會同勞崇光妥辦。其湖南軍務。已飭令賽尚阿會同程喬采辦理矣。現在道州賊

匪被剿緊急。難保不復竄廣西。即廣西未淨之匪。與廣東毗連湖南處所。亦難保不與道州賊匪暗相勾結接濟。該督統轄兩省。於楚粵交界地方。務須嚴密防守。以杜賊匪分竄。向榮現既稱病。其提督事務。暫令馬龍代辦。究竟該提督病勢如何。該督即察看具奏。廣東羅鏡逆匪。現交葉名琛督剿。該督仍當隨時咨商調度。迅速剿除。毋令久稽顯戮。廣西招募壯勇。聞多滋事。已諭令賽尚阿等酌量遣散。並著該督等設法彈壓。勿令別滋事端。將此由六百里諭知徐廣縉。勞崇光。並諭令葉名琛知之。○欽差大臣大學士賽尚阿奏。參候補知府謝繼超。不肯管帶潮勇。違令繳札。請革職留營。得旨。謝

繼超僅予革職。不足蔽辜。著發往軍臺効力贖罪。○兩廣總督徐廣縉奏報遵旨馳往梧州籌辦剿匪情形得旨。卿其妥為調度。一切軍務貴嚴不貴寬。○予廣西陣亡監生胡家貞賞卹如例。○丁亥。

上率

皇后詣綺春園。

皇貴太妃前行禮。○御同樂園升座受

皇后禮。○賜王公大臣蒙古王貝勒等食。○諭內閣朕惟易著咸恆首重人倫之本。詩歌雖肅。用端風化之原。綏萬福以咸宜。統六宮而作則。式稽令典。爰舉隆儀。貞貴妃鈕祜祿氏質

秉柔嘉行符律度。自天作合。聿徵文定之祥。應地無疆。斯協順承之吉。惟克懋修夫內治。允宜正位乎中宮。其立為皇后。以宣壺教。所有應行典禮。該部察例具奏。○以剿平廣西何名科等股匪出力。賞遊擊瑞保都司李成瑞守備唐文燦李正升楊致英知府馬麗文同知張汝瀛等花翎。知州李慶福等藍翎。餘升敘有差。○戊子。

萬壽節遣官祭

太廟後殿○遣官祭

福陵

昭陵

昭西陵。

孝陵。

孝東陵。

景陵。

泰陵。

泰東陵。

裕陵。

昌陵。

慕陵。○遣官祭。

孝和睿皇后暫安寢殿。○遣官祭。

孝德皇后殯宮。○遣官祭。

顯佑宮。

東嶽廟。

城隍廟。○

上詣。

安佑宮行禮。○詣綺春園。

皇貴太妃前行禮。○御正大光明殿。王以下文武大臣官員蒙

古王貝勒等行慶賀禮。○幸同樂園。賜王公大臣蒙古王貝

勒等食。○巳丑。

上幸同樂園。賜王公大臣蒙古王貝勒等食。○以工部右侍郎

錫齡為浙江鄉試正考官。翰林院編修劉書年為副考官。禮部右侍郎曾國藩為江西鄉試正考官。江南道御史丁浩為副考官。詹事府少詹事王履謙為湖北鄉試正考官。翰林院編修許其光為副考官。○庚寅。

上詣綺春園問

皇貴太妃安。○辛卯。

孝德皇后殯宮月祭遣官行禮。○諭內閣。戶部奏遵旨速議漕運事宜一摺。所有江安江廣各幫起運米石均著照該部所議分別催趲。並截留備賑抵給銀款。其浙江幫船本年秋間是否尚能改行海運。著陸建瀛悉心酌覈。如果確有把握。即

責成該督妥為辦理。應用水脚剝價等銀仍由浙江巡撫覈實籌備。儻因時交秋令。行駛維艱。該督即會同浙江巡撫妥商截卸。在附近上海地方存儲。於今冬豫籌來歲海運。毋得互相推諉。致干重咎。此次漕行遲誤。總由豐工未能合龍所致。陸建瀛楊以增著交部分別議處。另片奏銅鉛起運亟籌變通等語。著山東巡撫體察情形。於各運到境。即飭地方官雇備車輛。或多備剝船。催令迅速北上。其在後各運。並著兩江總督設法催出江境。毋任稍有遲延。○以內閣學士萬青藜署禮部右侍郎。載齡署工部右侍郎。兼管錢法堂事務。○壬辰。

上詣綺春園問

皇貴太妃安。○諭內閣僧格林沁奏。端華於大考翰詹時。為已革學士保清修補試卷等語。著端華明白回奏。是日監試王大臣載垣等。何以不行阻止。並著據實明白回奏。○又諭。賽尚阿奏。馳抵永州督辦軍務一摺。逆匪竄踞道州。經和春疊次移營進剿。於五里亭地方。傷斃賊匪百數十名。生擒五名。賊眾仍踞城築牆。意圖抗拒。現在賽尚阿已於六月初一日。馳抵永州府城。分派各路官兵。四面進逼。和春劄營道州城北。與東面聲勢聯絡。劉長清。王家琳。鄧紹良等。各帶重兵。分扼西南。布置尚屬妥協。著即會同程喬采。督飭統兵各員。乘

此兵勇雲集之時。合力兜剿。務將屯聚逆匪。悉數殲除。毋任竄逸。復滋擾害。○癸巳。

上幸萬壽山。○諭內閣。本日據端華。載垣等。遵旨回奏。各一摺。殿廷考試。功令綦嚴。端華經朕特派監試。輒為已革侍講學士保清修補試卷。實屬違例。著退出御前大臣。交宗人府議處。載垣未能阻止。著一併交宗人府議處。珠勒亨。特興額。多爾濟。那木凱。明慶。穆克登額。德木齊。扎布。繼善。恩醇。聯順。安興。阿。托精。阿。索布。多爾。扎布。均著傳旨申飭。○諭軍機大臣等。御史彭慶鍾。奏粵匪盤踞道州。請飭江西省實力防堵。一摺。江西吉安府屬之龍泉永新。及袁州府屬之宜春萍鄉等

處均與湖南接壤。現在粵西逆匪盤踞道州。經官兵四面攻剿。難保不潰圍奔竄。擾及鄰境。著陸建瀛、陸元烺體察情形。於各屬要隘添派得力將弁。密為布置。實力巡防。勿任竄入。但不可稍涉張皇。致令居民紛紛遷徙。原摺著鈔給閱看。將此各諭令知之。○甲午諭內閣。舒興阿奏遵旨籌議番務章程一摺。並開單呈覽。朕詳加披閱。所稱分別地界。以杜推諉。不分畛域。以嚴堵擊。徵調營汛。發給令旗。裁撤零卡。統歸總隘。以及添派馬探。增築壕壘。各營會哨。隨地梭查。番族歲賞。仍復舊例各條。籌畫均屬周妥。著即照所議辦理。該督惟當督飭邊卡文武員弁。實力奉行。勿得日久生懈。其各條內尚

有未盡事宜。著再行詳晰酌覈。分別奏咨辦理。○福建臺灣鎮總兵官恆裕臺灣道徐宗幹奏謝議敘。恩得旨。汝二人。事和衷。辦理方好。海疆重地。尤為緊要。不可見小而忘大。勉之慎之。○以剿辦甘肅黑城子撤回出力。賞千總溫積桂等。藍翎守備楊正才等。升敘有差。○以派辦甘肅蒙古番族事件出力。予知縣吳春煥等。升敘有差。

大清文宗協天翊運執中垂謨懋德振武聖孝淵恭端仁寬敏
顯皇帝實錄卷之六十三

實錄卷之六十三

三

